



### EDITORIAL

## Atuhan an larang ni Duterte para ha mas hiluagan nga panmatay

Uhaw ha dugo hi Rodrigo Duterte. Nanawagan hiya hini nga naglabay nga armas an mga “kontra-krimen nga sibilyan nga boluntir.” Ha butnga han waray kapareho nga pagkukuri han katawhan, butaray niya nga gin-endorso an mas hiluagan nga panmatay agud payukbuon an ngatanan ha iya paghahadi ngan pahugton an iya katin ha poder.

Ha kamatuoran, hi Duterte na an pinakadominante nga kriminal ha nasud yana. Waray pa hiya makuntento ha narunapulo kayukot nga ginpatay niya ha ngaran han “gerra kontra-druga” ngan todo-gerra kontra ha “terorismo.” Ha lima katuig niya ha poder, gin-gamit niya an terorismo han estado agud paawason an dugo, puuhon an rebolusyunaryo nga kagiusan, ngan puypuyon an iya mga karibal ha pulitika ngan negosyo han ilegal nga droga. Katin niya an iya Duterte Death Squad o DDS sugad liwat an AFP-PNP nga iya ginbaydan agud magserbe

komo *private army* para ha iya kontra-rebolusyunaryo ngan kriminal nga katuyuanan.

Yana, tungod kay nahahadlok nga mapaiwas, andam hiya nga himuon an ngatanan agud pumatay pa hin mas damo. Matikagrabe an kabangis samtang natikaapiki an eleksyon 2022. An panawagan niya nga pag-armas han mga sibilyan senyales ha iya mga *death squad* nga papintason an pangatake ha ngatanan nga naato ha iya, nga masayon na la tahuban komo gin-himo han mga “sibilyan nga boluntir.” Masayon liwat ibasol ha Bagong Hukbong Bayan an pangatake ha mga pangontra han paksyon nga maka-Duterte, sugad hadton ginpatay han PNP nga meyor han Calbayog City. Magserbe naman ini nga rason para pagrabi-hon an pangatake ha mga demokratico nga pwersa nga gintatahan nga nasuporta ha BHB. Ngan antes pa an pag-anunsyo ni Duterte, mayda na gidaan nga impormasyon hiunong ha

“Atuhan...,” *sundan ha paypay 2*

## Mga tropa han RCSP han 20th IB, ginpaiwas han BHB

MADINAUGON NGA NAPAIWAS han Bagong Hukbong Bayan-Northern Samar (Rodante Urtal Command o BHB-RUC) an mga tropa han 20th Infantry Battalion nga naghihimo han Retooled Community Support Program (RCSP) ha pira nga baryo ha Las Navas, Northern Samar pinaagi han susrunod nga taktikal nga opensiba ha naglabay nga mga semana.

Magkasunod nga gin-isnayp han BHB-RUC an mga sundalo nga nag-ooperasyon ha Brgy. Epaw hadton Hunyo 18 han gab-i ngan 19 han kaagahon. Naringgal an kaaway pinaagi la han usa nga buto nga nakadaplis ha ira upisyal. Komo pagbulos, nagpauran hira han bala han M203, 105mm *howitzer*, masinggan nga K3 ngan iba pa nga higtaas nga kalibre han pusil. Kundi antes pa hira makabulos, talwas na nga nakaatras an mga Pula nga mangaraway. Han kaagahon, utro nga gin-isnayp han BHB-RUC an mga sundalo nga nagpauran na liwat han bala. Waray gihapon nahaguguman nga kaswalti an BHB.

Antes hini, ginpabuthan han BHB-RUC an mga sundalo nga nagkakampo ha butnga han Brgy. Sag-od nga kasapit han Epaw hadton Hunyo 11. Bisan kun diri grabe an kahibangan nga igindurot ha kaaway, waray



“Mga tropa...,” *sundan ha paypay 2*

# CARP33: Pagpadayon han buwa nga reporma ha tuna

**G**intapo han protesta han masa nga parag-uma an ika-33 nga anibersaryo han buwa nga reporma ha tuna ilarum han Comprehensive Agrarian Reform Program (CARP). Sigon kan Marco Valbuena, tagapagyakan han Partido Komunista ng Pilipinas, dugang nga naggrabe an kamutangan han mga parag-uma makalabay an masobra tulo kadekada han implementasyon hini.

Pakyas an CARP nga rumkon an monopolyo ha tuna han dagko nga agaron maytuna. Aada la ha 41% han mga pribado nga mga agrikultural nga tuna an gin-api ha programa han distribusyon. Nag-alutaga na an guberno hin maabot ha P409 kabilyon para ha implementasyon hini kundi dako nga parte hini nahingadto la komo danyos-perwisyo ha agaron maytuna. Masobra 90% han mga “bene-pisyaryo” han CARP waray man makagbayad han mga ginsusukot ha ira ngan dugang hira nga nalubong ha utang.

“An tinuod nga kahimtang ha Pilipinas amo an nagpapabilin nga waray tuna an kadam-an ha parag-uma ngan trabahador ha uma samtang nakakonsentra an tuna ha kamot han pipira nga agaron maytuna ngan langyaw nga tag-iyang mga plan-tasyon,” sigon kan Valbuena.

Kundi, sigon ha PKP, ginpagrabe han CARP ngan han sumunod nga CARP Extension with Reforms o CARPER an panlupot han tuna han mga agaron maytuna, mga langyaw nga kapitalista ngan mga debeloper han *real estate* (negosyo han pabalay

ngan komersyal nga bilding). Tikang hadton 1988, masobra 100,000 kaektarya han produktibo nga agrikultural nga tuna an nakumbert ngan nahingadto ha ira.

“An reporma ha tuna, agud magin tinuod, kinahanglan libre nga magdistribwer han tuna ha mga naghulad hini,” sering ni Valbuena. Pinaagi han iya kusog-pagtrabaho, an parag-uma an naghuhulad han tuna agud magin produktibo ini kundi ginitiyupi hira han mga agaron maytuna. Gin-aantos nira an maabot ha 50-70% nga plete ha tuna, usura, ngan himubo nga suhol para ha mga trabahador ha uma.

Ha mga rebolusyunaryo nga base, iginpapatuman han Bagong Hukbong Bayan (BHB) ngan han rebolusyunaryo nga masa an minimum ngan maksimum nga reporma ha tuna subway ha Rebolusyunaryo nga Giya ha Reporma ha Tuna. Milyun-milyon nga parag-uma na an nagpulos dinhi.

“Ginpapakusog han mga kadaugan ha reporma ha tuna an mga pundasyon han pampulitika nga poder han rebolusyunaryo nga guberno ha yukut-yukot nga barangay ha bug-os nga nasud,” sigon kan Valbuena. Paliwanag niya, pinaagi hini, nakukuha han BHB an hiluag ngan hilarum nga suporta han masa nga parag-uma. Nakakatirok han kusog an BHB agud ipasulong an panmaihaan nga gerra han katawhan ngan agud pabagsakon an reaksyunaryo nga estado han dagko nga agaron maytuna ngan dagko nga burgesya kumprador. ■

“Atuhan...,” tikang ha paypay 1

mga ginbubug-os nga *death squad* nga katin han militar ngan ginsaaran han milyun-milyon kapisos nga pahalipay.

Gin-gagamit ni Duterte an bug-os nga kamadarahug han terorismo han estado tungod kay maaram hiya nga naihap na la an mga adlaw han iya paghahadi. Labaw hiya nga nahimulag ha katawhan ngan nabubuksas na an mga butak ha ranggo han iya mga alipures. Naticakusog an panawagan han katawhan agud papagbatunon hiya ha iya mga krimen, tapuson an iya tiraniya, ngan kab-uton an makatadungan nga pagbabag-o.

Kinahanglan ibuksas ngan atuhan han ngatanan nga Pilipino an berdugo nga rehimen Duterte. Kinahanglan hira magpursige nga ipasulong an ngatanan nga porma han pakigbisog agud ihimulag, paluyahon, atuhan ngan pakasyon an ngatanan nga larang niya nga mag-iha ha poder. ■

“Mga tropa...,” tikang ha paypay 1

hira hunungi han mga Pula nga mangaraway ngan pira kabeses pa nga ginbira tubtub nga nagkagikan ha kahadlok an mga sundalo. Tikang hadton Hunyo 21 hasta yana, waray na tropa han RCSP ha mga nasering nga baryo sugad liwat ha Sitio Inuman, Brgy. Tagab-iran, Brgy. Tagan-ayan, ngan Brgy. San Jose.

Grabe nga perwisyo ngan peligro an dara han mga tropa han RCSP ha mga residente. Ha Epaw, ginpirit nira an mga sibilyan nga upisyal han barangay nga umapi ha mga operasyon militar, sugad han 24 kaoras nga pagwardiya ngan regular nga pagrobing ha palibot han baryo.

Ha pareho nga bulan, ginsirutan liwat han BHB-RUC hi Obie Baluya, aktibo nga aset han 20th IB ha Brgy. Tagab-iran. Responsable ini ha pagpatay kan Dodoy Ursolino ngan ha pagkawit ha diri mamenos ha duha nga karabaw ha ira lugar. ■



## 2 nga trak han PNP-SAF, nahulog ha bangin

DOSE NGA TROPA an namatay samtang 19 nga iba pa an samaran han dumarusdos an duha nga trak han Philippine National Police-Special Action Force (PNP-SAF) ha usa nga bangin ha Las Navas, Northern Samar hadton Hunyo 23 dapit alas-2 han kaagahon.

Nawarayan hin preno an usa ha mga trak samtang nabyahe tipaubos tikang ha gihitas-i nga parte han kalsada giutan han Brgy. Dolores ngan Brgy. Quirino ngan bumangga ha ginsusundan hini nga trak. Nagdirudiretso an duha nga trak tubtub nga nahulog ha bangin.

Sigon ha mga residente, upat an namatay ha aktwal nga panhitabo, samtang walo an namatay ha ospital tungod ha pagbinyaha nira han kaagahon. Kaupod ha mga sakay han trak an duha nga surenderi nga nagserbe komo giya ha mga pulis.

Ha pareho nga semana, naghimo han operasyon saywar an PNP kaupod an 8th Infantry Division ngan 20th Infantry Battalion ha mga barangay han Osang ngan Nagoocan ha bungto han Catubig. Nagpaanyag an mga tropa ha mga residente komo panhugay. Nagbalay-balay liwat hira ngan ginmiting an mga upisyal han barangay para kuno “magsarbey” hiunong ha Barangay Development Program han NTF-ELCAC agud ipagawas nga gindedemanda ini han molupyo.



## NTF-ELCAC, nangangampanya kontra ha pagtanggahan han pork barrel han militar

GINMANDUAN HAN NATIONAL Task Force to End Local Communist Armed Conflict (NTF-ELCAC) an mga barangay ha Gamay, Northern Samar, Dolores, Eastern Samar, Matag-ob, Tabango, Villaba, Calubian, ngan mga bungto ha prubinsya han Leyte nga maghimo han resolusyon nga nananawagan nga igpabilin an *pork barrel* han militar ha tahub han Barangay Development Program (BDP.)

Sigon ha mga report nga nakarawat han Demokratiko nga Gubernero han Katawhan, ginpapahimo han NTF-ELCAC an mga upisyal han barangay han resolusyon nga nagpapahayag hin pagsuporta ha pagpadayon han pagpondo ha BDP. Ginsaaran hira han P20 kamilyon nga pondo bisan kun waray bisan usa nga barangay an kalakip ha unom nga “benepisyaryo” han BDP ha Eastern Visayas.

Ini nga mapan-uwat nga pagpapirma an pinakabag-o ha mga paningkamot han NTF-ELCAC ha pagseguro nga diri tatanggalan han pondo an pasista nga *task force*. Karuyag hini seguruhon an maabot ha P44 kabilyon

nga pondo han BDP nga ira gagamiton agud hugayon an mga militarista nga lokal nga upisyal nga pumabor ha mga maka-Duterte nga kandidato ha eleksyon 2022. Nahiuna na nga nangampanya para ha BDP an tagapagyakan han NTF-ELCAC nga hi Lorraine Badoy kaupod an 803rd Infantry Brigade ha mga lokal nga upisyal ha Catubig han pareho nga prubinsya hadton Mayo.

Ginsisingabot han NTF-ELCAC an presente nga krisis ngan kagutom agud uwaton an kablasanon ha kabaryuhan nga mayda hira malalauman nga pondo pankauswagan, bisan kun igbubursa ngan papahimulsan la ini han rehimen Duterte. ■

## Mga taghimaryo, gin-uwat nga tumambong ha “peace rally” para ha aset han militar ngan maraut nga elemento

GIN-UWAT HAN 20th Infantry Battalion an mga residente han Brgy. Paco, Las Navas, Northern Samar hadton Hunyo agud mapatambong ha “peace rally” ngan pagawson nga ginkukundenar nira an pagsirot ha usa nga aset han militar ngan maraut nga elemento ha ira lugar.

Sigon ha report han BHB-Northern Samar (Rodante Urtal Command o RUC), nagpatawag han asembliya an mga tropa han 20th IB nga naghihimo han operasyon nga Retooled Community Support Program o RCSP ha *dancing hall* han barangay. Waray ig-anunsyo ha mga residente an adyenda han katitirok. Ha mismo nga programa na la nira nahibaruan nga an “peace rally” nagkukundenar ha pagsirot han BHB kan Jonie “Banong” Tortuna hadton Mayo. Ginpakatin han mga sundalo ha mga taghimaryo an mga gidaan na ginhimo nga plakard nga nagpapakauraut ha BHB.

Kagawad han Brgy. Paco ngan

tagapangulo han komite han barangay ha *peace and order* hi Tortuna, kundi sukwahi ha iginpagawas han militar, usa hiya nga kontrarebolusyunaryo ngan maraut nga elemento. Kalakip ha iya mga krimen ha katawhan an pagserbe komo aktibo nga aset han 20th IB ngan pagpatay ha duha nga sibilyan nga waray man sala.

Kahuman mapatay an ira aset, susrunod an pagbulos han mga armado nga tropa han rehimen ha mga residente han Paco. Labot ha paguwat ha mga residente, gindakop liwat nira an kapitan han barangay ngan gindara ha hedkwarters han kapulisan ha Las Navas. Temporaryo hiya nga ginbuhian yana. ■

**HA KAMATUORAN**

**Ginpapagawas nga “lider han BHB,” hadto anay priso nga umeskapo ha pangabuso han PNP**

USA NGA priso nga umeskapo kahuman makaeksperyensya han pangabuso ha kamot han Philippine National Police (PNP) an iginpapagawas komo usa nga hadto anay hitaas nga lider han Bagong Hukbong Bayan ha Samar.

Sigon ha PNP, nadakop nira ha Sampaloc, Manila hadton Hunyo 18 hi Rowel Mabahin, 21, nga nakaeskapo tikang ha hedkwarters han PNP ha Calbiga, Western Samar hadton 2019. Gin-aalegar nira nga platoon lider hiya han BHB ha Eastern Samar nga nakatambong kuno ha magkadirudilain nga treyning ngan nagin kaapi han *special operations group* o SOG han BHB.

Klaro nga buwa ini. Usa nga ordi-

naryo nga sibilyan hi Mabahin nga nakaeskapo ha Calbiga PNP ngan sumurender ha BHB kaupod han iya menor de edad nga bugto kahuman tarhugon nga papatayon han mga pulis. Nahiagum liwat ha grabe nga tortyur an manghod nga Mabahin ha ira kamot. Nakapriso hadto an magbugto tungod ha mga kaso han pangawat ngan pan-ngastigo. Makasisina an butaray nga paghinimu-himo han estorya ngan pagbinuwa han PNP

agud pakarauton an rebolusyunaryo nga kagiusan.

Kahuman umeskapo, dumiretso hira ha BHB agud boluntaryo nga sumurender dara an tulo nga riple nga M-16, tulo nga pistola, ngan gatus-gatos nga bala. Sigon ha BHB-Efren Martires Command, naduso an magbugto nga maghimo han mga krimen tungod ha kakurian. Kundi andam hira nga atubangon an rebolusyunaryo nga hustisya tungod kay andam hira nga hatagan hira han higayon nga magbag-o han kinabuhi, sukwahi ha ira nahiaguman ha kamot han PNP. ■

**COVID-19 ha EV**

Hinitaas hin

**75%** an kaso han COVID-19 ha **Eastern Visayas** sakob hin **25 kaadlaw** (Hunyo 3 tubtub Hunyo25).

**5** ha 6 nga prubinsya ha Eastern Visayas an **waray** pa gihapon **COVID-19**.

Ngatanan nga testing center konsentrado la ha prubinsya han Leyte.

**4** nga **ospital** ha rehiyon an **nagserra** tikang hadton Hunyo 18 tungod ha damo nga kaso han COVID-19 ha mga trabahador pankalibsugan hini.

**16** nga **trabahador** **pankalibsugan** ha **Motiong, Samar** an dudrungan nga **nagpositibo** ha **COVID-19**.

Kulang an Eastern Visayas hin

**35** nga doktor **20** nga *medical technologist*  
**169** nga nars

Ha Western Samar

**41,114** o (3.29%) pa la ha kinahanglan nga 1.25 kamilyon nga dosis han bakuna an nakarawat hadton Hunyo 22.

Ha Eastern Samar

**26,995** katawo pa la an kumarawat hin syahan nga dosis han bakuna.

**14,399** pa la an kumarawat han ikaduha nga dosis.

2-3 kabeses la kada semana abrido an mga *vaccination center* tungod kay **kulang an suplay han bakuna**.